

四庫全書

史部

欽定四庫全書

史部

欽定續通志卷三百二十四

中書臣
李采履勘

總校官原任侍講臣王燕緒

欽定四庫全書

欽定續通志卷三十四

列傳

宋

二十八

楊礪

宋湜

王嗣宗

李昌齡

絃

趙安仁

君錫

陳彭年

任中正

中師

周起

程琳

范雍

子奇坦

趙禎

任布

高若訥

孫沔

楊礪字汝礪京兆鄠人父仁儼仕蜀為丹稜令蜀平補
渭南主簿遷永和令礪建隆中舉進士甲科父喪服除
以祿不足養母閒居無仕進意親舊勸之乃赴官解褐
鳳州團練推官歲餘又以母疾棄官開寶九年詣闕獻
書詔試學士院授隴州防禦推官入遷光祿寺丞丁內
艱起就職久之轉秘書丞改屯田員外郎知鄂州以善
政聞真宗在襄邸礪為記室叅軍真宗尹開封礪為推

官嘗問礪何年及第礪唯唯不對後知其唱名第一自悔失問謂礪不以科名自伐甚重之儲宮建兼右諭德及即位拜給事中判吏部銓未幾召入翰林為學士咸平初知貢舉俄拜工部侍郎樞密副使二年卒年六十九帝軫悼之謂宰相曰礪介直清苦方當任用遽此淪謝即冒雨臨其喪礪僦舍委巷中乘輿不能進步至其第嗟憫久之贈兵部尚書子嶠至祠部郎中嶧至太常博士峭至太子中舍少子嶠至道初與張庶凝刊校

真宗儲邸書籍即位賜進士出身直史館至祠部郎中
宋湜字持正京兆長安人父溫故仕晉為左補闕從父
溫舒亦進士至職方員外郎兄弟皆有時名湜幼警悟
早孤與兄泌勵志篤學事父母以孝聞溫舒與耀州湜
侍行代作牋奏詞敏而麗溫舒拊背曰此兒真國器恨
吾兄不及見也太平興國五年隆平集作太平興國二年舉進士釋
褐將作監丞通判梓州遷右贊善大夫宋準薦其文拜
著作郎直史館雍熙三年以右補闕知制誥與王化基

李沆並命加戶部員外郎與蘓易簡同知貢舉俄判刑部淳化二年妖尼道安訟大理斷獄不當沆坐累降均州團練副使時母老沆留其室奉養移汝州與王禹偁並召入為禮部員外郎直昭文館五年以職方員外郎再知制誥判集賢院知銀臺通進封駁司至道元年為翰林學士兼修國史判昭文史館事加兵部郎中真宗即位拜中書舍人咸平元年改給事中充樞密副使帝幸大名命沆與王顯分押後陣駐蹕數日常召見便殿

方奏事以疾掖出帝臨視許以先歸賜衾褥曰此朕嘗御者雖故暗亦足禦道途之寒又遣內侍護送供帳至澶州卒於道年五十一贈吏部侍郎以子綸為太祝純為奉禮郎帝再幸河朔追悼之加贈刑部尚書諡曰忠定澁風貌秀整器識沖遠好學美文詞喜引重後進當世士流翕然宗仰之

王嗣宗字希阮汾州人父夢證成州軍事判官嗣宗少力學自奮遊京師以文謁王祐頗見優待開寶八年登

進士甲科補秦州司寇叅軍太宗征河東嗣宗陳邊事
召赴行在遷大理寺丞通判睦州改右贊善大夫徙河
州帝遣武德卒潛察遠方事嗣宗械送京師因奏曰陛
下不委任天下賢俊猥信此輩以為耳目臣竊不取帝
怒遣使械嗣宗下吏削職會赦復官尋以秘書丞通判
澶州並河東西植樹萬株以固隄防人為三司開拆推
官以左正言充河北轉運副使時邊境用兵崔翰為大
將嗣宗每以苦言激其展効太宗將議親征嗣宗上疏

言契丹必不至之狀甚見嘉納改左司諫歷京西轉運使又移河北貝州驍捷卒五十餘人謀竊發嗣宗率吏悉擒之遷虞部郎中至道初移河東轉運使知耀州又知同州加比部郎中淮南轉運使江浙荆湖發運使揚楚間有窄家神廟民有疾不餌藥但竭致祀以邀福嗣宗徹其廟自是民風稍變初漕運經泗州浮橋每多覆壞嗣宗徙置城隅遂獲安濟咸平三年以漕運稱職就拜太常少卿踰年以右諫議大夫充三司戶部使改鹽

鐵使嘗與度支使梁鼎戶部使梁顥同對言曰國家經費甚繁賦入漸少加以冗食者衆尤為耗蠹所宜裁節事有可省者願條列以聞從之明年將郊祀嗣宗因條上應奉諸物以及工作凡減雜物十萬六千省工九萬九千會罷三部使改左諫議大夫知通進銀臺司兼門下封駁事出知并州兼并代部署州境有卧龍王廟每窮冬闔境致祭值風雪寒甚老幼踣於道嗣宗亟毀之轉運使鄭文寶上其政績有詔褒美先是西邊市馬以

給北邊戰士有瘠弱者即送闕下暑月道遠多死嗣宗
建議以汾州地涼接樓煩諸監美水草請就牧放從之
詔拜御史中丞加兼工部侍郎權判吏部銓嗣宗剛果
率易無所畏憚每進見極談時事深詆參知政事馮拯
之短遂結宰相王旦弟旭使達意於旦以為助旦疾之
因力庇拯嗣宗大怒會愆雨請對因于帝前毀旦帝召
旦等詰之嗣宗理屈復以他辭侵旦旦不與抗乃已將
祀汾陰以永興重地思得大臣才兼文武者鎮之因謂

宰相曰嗣宗嘗自言知武事可授廩車以當此任宜召
問之嗣宗願奉詔即拜耀州觀察使知永興軍府真宗
作詩賜之時种放得告歸山嗣宗逆於傳舍禮之甚厚
放既醉稍倨嗣宗怒以語譏放放曰君以手搏得狀元
耳何足道也初嗣宗試講武殿搏趙昌言帽擢首科故
放及之嗣宗愧恨因疏言所部兼并之家侵漁衆民凌
暴孤寡凡十餘族而放為之首願徙放嵩山疏詞極于
詬辱至目放為魑魅帝方厚待放令徙居嵩陽避之四

年邠寧陳興擅釋劫盜徙知邠州兼邠寧環慶路都部
署城東有靈應公廟旁有山穴羣狐處焉妖巫挾之為
人禍福民甚信前此長吏皆先謁廟然後視事嗣宗燠
其穴得數十狐盡殺之淫祀遂息徙知鎮州發邊肅姦
賊肅坐貶嗣宗嘗言徙种放掘邠狐按邊肅為去三害
居二歲召還授樞密副使檢校太保時寇準為樞密使
嗣宗與之不協累表解職授檢校太傅求罷除大同軍
節度使知許州嗣宗嘗遊是州別墅在焉時人以為策

知河南府天禧初改威德軍節度徙知陝州再表請老
且求入覲遣使召還改靜難軍節度既至闕下病足不
能朝謁乃求再知許州不復議休退寇準為相素惡之

特命以左屯衛上將軍檢校太尉致仕

按宋史宰相表載王嗣宗以天

平軍節度使致仕

五年卒年七十八贈侍中諡曰景莊錄其子

二人官嗣宗事三朝最為宿舊所至以嚴明御下尤傲
狠務以醜言凌挫羣類為中丞日常忿宋白郭贄邢昺
七十不請老屢請真宗敕其休致又遣親屬諷激之及

嗣宗晚歲疾甚猶享厚祿徘徊不去嘗謂人曰僕惟此一事未能免物議衆皆嗤之子堯臣內殿承制唐臣太子中舍

李昌齡字天錫宋州楚邱人父運太常卿昌齡太平興國三年舉進士授大理評事通判合州累擢右拾遺直史館丁內艱起為淮南轉運使轉戶部員外郎知廣州廣有海舶之饒昌齡不能以廉自守淳化二年代還其父嘗典許州有第在城中昌齡包苴財物悉留貯焉其

至京城但藥物藥器而已會有言其貪者太宗以為誣
擢禮部郎中逾月為樞密直學士是秋初置審刑院於
禁中凡獄具上奏先申審刑院印付大理刑部斷覆以
聞又下審刑中覆裁決以付中書當者行之否則宰相
聞以論決命昌齡知院事又權判吏部流內銓進右諫
議大夫充戶部使改度支使拜御史中丞下詔御史臺
合行故事並條奏以聞獄無大小自中丞以下皆親臨
鞠問不得專責所司李繼隆受命河朔征討不赴臺辭

昌齡糾之遣吏追還罰奉又劾陝西轉運使鄭文寶生
事邊境築城沙磧輕變禁法文寶坐貶湖外至道二年
以本官參知政事昌齡居位頗遜悞無所建明真宗即
位加戶部侍郎生交結王繼恩貶忠武軍節度行軍司
馬咸平二年起為殿中少監會詔羣臣言邊事昌齡求
面陳事機不報王均之亂命知梓州改河陽又改光州
就改光祿卿疾不能治事轉運使以聞命守本官分司
西京尋請致仕帝曰昌齡素無清譽乃授祕書監遂其

請大中祥符元年卒年七十二錄子虞卿試將作監主簿昌齡兄昌圖弟昌言從子絃

絃字仲綱父克明仕至提點廣東刑獄絃進士及第試祕書省校書郎知歙縣地產黃金民輸以代賦後金竭責其賦如故絃奏罷之歷知於潛剡縣治有惠愛御史知雜呂夷簡薦之改著作佐郎知靈池縣劉筠蔡齊舉為御史臺推直官拜監察御史時召成都府樂工許朝天等補教坊絃言陛下即位尚未能顯巖穴之士而首

召伶人非所以廣德美於天下朝大等遂罷歸遷殿中
侍御史閣門使王遵度領皇城遣卒刺事告賈人有為
契丹間諜者捕繫皇城司按劾命絃覆訊絃悉得其寃
抵卒罪降遵度曹州兵馬都監判三司開拆司轉郡旱
流星墜西南有聲僧禳於文德殿絃奏曰文德殿布政
會朝之正位每災異輒聚緇黃讚唄其間何以示中外
改鹽鐵判官歷梓州陝西河北路轉運使遷侍御史建
言西北久通好士習安佚不知戰陣之法宜擇良將練

精卒去冗情實倉庫豐財用為守禦備舉种世衡等數人及秦罷貢餘物遺近臣積官進龍圖閣直學士知秦州卒絃方介有吏材篤於交遊與劉顔為友顔死移任子恩官其子子師中至天章閣待制

趙安仁字樂道河南洛陽人父孚字大信周顯德初舉進士調補開封尉太祖乾德中為浦江令父喪服闋攝永寧令會親征太原部送本邑糧饋民懷其惠列狀以聞即真授其任擢宗正丞俄坐事連連抵罪語見趙普

傳太宗即位起為國子監丞知袁州還知開封府司錄
參軍事受詔與殿中侍御史柴成務等行視黃河分南
北岍按行復遙隄以紓湍決乎言治遙隄不如分水勢
於是建議于澶滑二州立分水之制時決河未平重惜
民力事遂寢朝廷議行封禪乎上封禪頌召拜秘書丞
受詔鞠開封獄得其非辜者即日授推官遷監察御史
出知舒州改殿中侍御史雍熙中詔詢文武禦戎之策
乎奏曰者北邊未賓全燕猶梗再興軍旅將復土疆臣

竊計屯戍邊陲故非得已暴露原野豈是願為欲望朝廷通達國信諭以禍福示以恩威議定邊疆永息征戰帝嘉之雍熙中廷策貢士而安仁預為考會賜金紫因顧安仁問享年幾安仁曰臣父年六十二帝曰乎名士也亟召對亦賜金紫明年卒安仁生而穎悟幼時執筆能大字十三通經傳大旨早以文藝稱雍熙二年登進士第補梓州權鹽院判官以親老弗果往會國子監刻五經正義板本安仁善楷隸遂奏留書之授大理評事

光祿寺丞召試翰林以著作佐郎直集賢院遷太常丞
真宗即位拜右正言預重修太祖實錄帝出師大名安
仁疏言急務者三大要者五急務三者一激勵戎臣舉
勸懲之典二賑救邊民行優恤之惠三車駕還京重神
武之威大要五者一選將略二持兵勢三求軍謀四修
軍政五愛民力咸平三年同知貢舉未幾知制誥繼判
尚書刑部兼制置羣牧使同知三班宿官院景德初翰
林學士梁顥卒即以安仁為工部員外郎充翰林學士

初乎極陳和好之利至是安仁從幸澶州會北邊請盟
首命安仁撰答書又獨記太祖時聘問書式契丹使至
首命接伴凡覲見儀制多所裁定北使姚柬之至又令
安仁接伴束之頗矜兵強戰勝安仁曰老氏云佳兵者
不祥之器聖人不得已而用之勝而不美勝而美之者
是樂殺人也樂殺人者不得志於天下束之自是不敢
復言王繼忠將兵陷契丹不能死節而反事之束之屢
稱其材安仁曰繼忠早事藩邸聞其稍謹不知其他其

敏于酬對切中事機類如此時論翕然稱其得體帝益
器之自是有意柄用二年又與晁迥等同知貢舉三年
以右諫議大夫參知政事俄修國史拜工部侍郎進秩
刑部五年以兵部侍郎仍兼修史八年知貢舉三興春
閣擇士平允是故獨無譏誚帝再賜詩嘉之國史成進尚
書右丞天禧二年改御史中丞卒年六十一贈史部尚
書諡文定以其子溫瑜為大理寺丞至國子博士良規
為奉禮郎承裕為正字安仁質直純慤無所矯飾寬恕

謙退與物無競雖家人僕使未嘗見其喜愠善訓諸子
各授一經嗜讀書所得祿賜多以購書尤知典故凡近
世典章人物之盛悲能記之良規賜進士及第後仕至

尚書工部侍郎知濠州卒子君錫

按宋史此下有安仁子良規附傳無事蹟

足錄今
從刪

君錫字無愧性至孝母亡事父良規不違左右夜則寢
於旁凡如內則所載者無不親之及登進士第以親故
不願仕良規每出必扶掖上下至雜立僕御中嘗從謁

文彥博彥博異其容止問而知之語諸子令視以為法良規沒訓知武強縣累遷宗正丞時增諸宗院講書教授官而逐院自備緡錢為月餽貧者或不能以時致君錫言國家養天下士於太學尚不較其費今教育宗室不宜令自行束修詔悉從官給歷開封府推官元祐初遷司勳右司郎中太常少卿擢給事中論蔡確章惇有罪不宜復職大河不可輕議東回請亟罷修河司以省邦費寬民力進刑部侍郎樞密都承旨拜御史中丞上疏

勸帝親講學廣諮問為躬政之漸君錫素有志行後隨人低昂無大建明初蘇軾出知杭州君錫極論其賢及賈易劾軾題詩怨謗即繼言軾負恩懷逆無禮先帝願亟正其罪宣仁后覽之不悅曰君錫全無執守以吏部侍郎天章閣待制知鄭陳澶三州河南府徙應天紹聖中貶少府少監分司南京卒年七十二紹興六年贈徽猷閣直學士

陳彭年字永年撫州南城人父省躬為鹿邑令彭年幼

好學母惟一子愛之禁其夜讀書彭年篝燈密室不令
母知年十三著皇綱論萬餘言為江左名輩所賞嘗師
事徐鉉為文太平興國中舉進士在場屋間頗有雋名
然桃薄好嘲咏頻為宋白所黜雍熙二年調江陵府司
理叅軍換江陵主簿歷澧懷二州推官在懷深為知州
喬惟岳倚任御史中丞王化基薦其才改衛尉寺丞遷
祕書郎為大理寺詳斷官坐事出監湖州鹽稅尋又停
官彭年素貧窶居喪免職賴僕人傭販以濟真宗即位

復為祕書郎喬惟岳刺史海州及知蘇壽二州並表彭
年通判州事咸平三年屢上疏言事召試學士院遷祕
書丞知閬州未行改金州上疏言五事一曰置諫官二
曰擇法吏三曰簡格令四曰省冗員五曰行公舉會召
舉賢良方正翰林學士朱昂以彭年聞召之辭以貧乏
請終秩景德初代還直祕閣杜鎬乃衍薦其該博命直
史館兼崇文院檢討又代潘慎修起居注獻大寶箴頌
之預修冊府元龜遷右正言充龍圖閣待制先是詔諫

官御史舉職言事惟彭年與侍御史賈駒數有章奏建
白彈射帝令中書置籍記之加刑部員外郎與晁迥同
知貢舉請令有司詳定考試條式帝因令彭年與戚綸
叅定多革舊制專務防閑其所取者不復揀擇文行止
較一日之藝雖杜絕請託然真甲等者或非宿學之士
大中祥符元年議建封禪彭年預詳定儀注上言辨正
包茅之用禮成進秩工部郎中加集賢殿修撰歷遷龍
圖閣直學士進右諫議大夫兼祕書監詔就賜食廳編

次太宗御集賜勲上柱國嘗因奏對帝言儒術汙隆實
關國家隆替太祖太宗丕變弊俗崇尚斯文朕獲紹先
業謹導聖訓禮樂交舉儒術化成實二后垂裕之所致
也又言君之難由乎聽受臣之不易在乎忠直君以寬
大接下臣以誠明奉上君臣之心皆歸于正直道而行
至公相遇孰謂難哉彭年曰陛下聖言精詣足使天下
知訓伏願躬演睿思著之篇翰帝為製崇儒術為君難
為臣不易二論彭年請示輔臣刻石國子監六年召入

翰林為學士兼龍圖閣學士同修國史彭年嘗謁王旦
旦辭不見翼日見向敏中敏中以彭年所上文字示旦
旦瞋目不覽曰是不過興建符瑞圖進取耳帝奉祀亳
州太清宮丁謂為經度制置使以彭年副之又與謂同
知禮儀院禮成加給事中又為天書同刻王副使國史
成遷工部侍郎九年拜刑部侍郎叅知政事判禮儀院
充會靈觀使天禧大禮為天書儀衛副使又為叅詳儀
制奉寶冊使進兵部侍郎以疾表求罷奉不許卒年五

十七贈右僕射諡曰文僖錄子銓期大理寺丞孫彥先
太常寺奉禮郎彭年性敏給博聞強記貴至通顯奉養
無異貧約所得奉賜惟布書籍大中祥符間附王欽若
丁謂朝廷典禮無不參預其儀制沿革刑名之學皆所
詳練若前世所未有必推引依據以成就之時政大小
日有詔訪應答該辯一無凝滯皆與帝意合故眷遇特
厚云

任中正字慶之曹州濟陰人父載官右拾遺中正進士

及第為池州推官歷大理評事通判邵州改濮州以翰林學士錢若水薦遷祕書省著作佐郎判大名府召為祕書丞江南轉運副使中正軀幹頗長帝擇大笏命內臣取緋衣之長者賜之至部歲大稔民出租賦平糴皆盈羨發運使王子興欲恣調餉京師中正曰東南歲輸五百餘萬而江南所出過半今歲有餘或歲少歉則數不登患及吾民矣乃止推監察御史兩浙轉運使民飢中正不俟詔發官廩賑之推樞密直學士代張詠知益

州在郡五載遵詠條教蜀人知之知審刑院出知并州
遷給事中權知開封府大中祥符九年拜尚書工部侍郎
樞密副使馬知節知樞密院改同知院事明年曹利用
為樞密使復為副使再進兵部侍郎叅知政事仁宗
為東宮時以右丞兼賓客遷工部尚書及即位拜兵部
尚書中正素與丁謂善謂且貶左右莫敢言者中正獨
營救謂降太子賓客知鄆州中行中師皆坐貶頃之以
母老徙曹州遷禮部尚書卒贈尚書左僕射諡康懿

中師字祖聖進士及第試祕書省校書郎知平陸縣以
張知白薦遂為右正言中正貶中師亦降太常博士監
宿州酒稅未幾通判應天府曹利用辟為羣牧判官徙
知滑州入為開封府判官累遷尚書度支郎中直史館
知澶州以太常少卿直昭文館知廣州視事之明日吏
白故事當謁諸祠廟而解有淫祠中師遂命撤去之兼
市舶使市舶置使自此始代還為右諫議大夫判尚書
刑部加集賢院學士再加澶州未行進龍圖閣直學士

知并州許便宜從事歷改樞密直學士知益州先是轉
運使韓瀆急於籠利自新芻蔬果之屬皆有算而中師
盡奏蠲之康定中任布守河陽數上書論事帝欲用之

呂夷簡薦中師才不在任布下遂並召為樞密副使

按任

布本傳及宋史宰輔表俱作召為樞密副使後罷知河
陽此云任布守河陽數上書論事遂並召為樞密副使
以守河陽在召
為樞密前誤 明年建北京令中師領修建進給事中

宣撫河東不行求補郡以尚書禮部侍郎資政殿學士
知永興軍求內徙得知陳州踰年上書言臣老矣家本

曹人願得守曹遂又改知曹州改戶部侍郎明年請老
拜太子少傅致仕進太子少師卒贈太子太傅諡安惠
中師性樂易平居自奉甚儉約晚號大塊翁

周起字萬卿淄州鄒平人生而豐下父意異之曰此兒
必起吾門因名起幼敏慧如成人意知衛州坐事削官
起年十三詣京師訟父冤父乃得免故官起舉進士授
將作監丞通判齊州擢著作佐郎直史館累遷戶部度
支判官以右正言知制誥權判吏部流內銓尋為東京

留守判官真宗東封還近臣多頌功德起獨以居安為
戒進金部員外郎判集賢院初置糾察刑獄司因命起
起乃請諸已決而事有所枉及官吏非理榜掠者並聽
受訢從之擢樞密直學士權知開封府歷徙永興天雄
軍所至有風烈遷右諫議大夫知并州拜給事中同知
樞密院事進禮部侍郎為樞密副使起素善寇準準且
貶起亦罷為戶部郎中
按宋史宰輔表天禧四年九月
乙未周起自禮部侍郎樞密副
使以戶部侍郎知青州王安石
撰起神道碑亦作戶部侍郎
知青州又降太常少卿

歷知應天府丁謂既敗復為禮部侍郎以疾請知潁州徙陳州汝州卒贈禮部尚書諡安惠起性周密凡奏事及答禁中語隨輒焚草故其言外人無知者予延荷以孝友聞官殿中丞延雋頗雅厚官太常少卿

程琳字天球永寧軍博野人舉服勤辭學科補泰寧軍節度推官改祕書省著作佐郎天禧中召試置集賢院仁宗即位改太常博士權三司戶部判官契丹使至琳為館伴使契丹使言先皇帝嘗通使承天太后獨無使

何也琳曰南北兄弟也先皇帝視承天猶從母故無嫌
今皇太后乃嫂也禮不通問使者語屈時修真宗實錄
而大中祥符以來起居注闕琳追述上之遂修起居注
擢知制誥判吏部流內銓權三司使范雍使契丹命琳
發遣三司使太倉贍軍粟陳腐不可食歲且飢琳盡發
以貸民凡六十萬斛飢民賴以全活而軍得善粟契丹
遣蕭蘊杜防來蘊出坐位圖示琳曰中國使者坐殿上
位次高今我位乃下請升之琳曰此真宗所定不可易

防曰大國之卿可當小國之君琳曰南北雖兩朝安有
大小卿嘗坐我殿上我顧小國耶防無以對宰相將許
之琳曰許其小必啓其大乃止以右諫議大夫權御史
中丞時歲飢上疏請罷諸土木營造蠲被災郡縣租賦
改樞密直學士知益州遷給事中權知開封府王蒙正
子齊雄捶老卒死貨妻子使以病告琳察其色辭異令
有司驗得狀蒙正連姍章獻太后家太后謂琳曰齊雄
非殺人者乃其奴嘗捶之琳曰奴無自專理且使令與

已犯同太后嘿然卒論如法外戚吳氏離其夫而挈其女歸夫訴于府琳為還女吳氏言已納宮中琳請於帝曰臣恐天下人有竊議陛下奪人妻女者帝亟命出之笞而歸其妻遷工部侍郎龍圖閣學士復為御史中丞不拜尋以翰林侍讀學士兼龍圖閣學士再知開封府改三司使出納尤謹禁中有所取輒奏罷之內侍言琳專琳曰三司財賦皆朝廷有也臣為陛下惜於臣何有帝然之時議者患民稅多目吏得為姦欲併其名合為

一琳曰合而為一易於勾校可也後有興利之臣復用

舊名增之是重困民也議者莫能奪

按歐陽修撰琳神道碑載此事較為

明晰今據叅輯

再遷吏部侍郎景祐四年遂叅知政事遷尚書

左丞時元昊反猶遣使來朝衆請按誅之琳曰遣使常

事也殺之不祥後使者益驕橫大臣患之琳曰始不殺

無罪也今既驕橫可暴其惡誅之國法也又何患耶議

者欲重賄嘉勒斯賚使討賊因以其地與之琳曰使嘉

勒斯賚得地是復生一元昊矣不若用間使二羌勢不

相合中國利也故樞密副使張遜曾孫偕才七歲宗室女生也貧不自給乳媪擅出券鬻其第琳欲得使開封府吏密諭媪偕幼得御寶許鬻乃售乳媪以宗室女故入宮見章惠太后既得御寶琳乃市取之又令吏市材木買婦女已而吏以贓敗御史按劾得狀降光祿卿知潁州頃之為戶部侍郎尋復吏部知天雄軍又以左丞為資政殿學士及建天雄軍為北京內侍皇甫繼明方用事主營宮室欲侈大以要賞琳以為方事邊陲人事

土木以困民不可既而繼明數有論奏帝遣御史魚周詢按視遂罷繼明命琳獨主之遷工部尚書加大學士河北安撫使改武昌軍節度使知永興軍陝西安撫使以宣徽北院使判延州仍為陝西安撫使元昊死諒祚立方幼三大將分治其國議者謂可因此時以節度使啖三將使各有所部分以弱其勢琳曰幸人之喪非所以柔遠人不如因而撫之議者惜其失機嘗獲戎首不殺戒遣之夏人亦相告勿捕漢民久之夏人以五百戶

驅牛羊叩邊請降且言契丹兵至街頭國中亂願自歸
琳曰彼詐也契丹至帳下當舉國取之豈容有來降者
間聞夏人方捕叛者此其是耶不然誘我也拒不受已
而賊果以騎三萬臨境上以捕降者為辭琳諜知之聞
壁倒旗戒諸將勿動賊疑有備遂引去拜同中書門下
平章事判大名府琳持重不擾前後守魏十年度要害
繕壁壘增守備禦植雜木數萬曰異時樓櫓之具可不
出于民矣人德之歷鎮武勝鎮安上書曰臣雖老尚能

為國守邊未報得疾卒贈中書令諡曰文簡琳敏屬深
嚴長於政事辨議一出不肯下人然性嗇於財而厚自
奉養章獻太后時嘗上武后臨朝圖人以此薄之

按宋史此

下有姜遵傳無事
蹟足錄今從刪

范雍字伯純其先太原人後家河南中進士第為洛陽
縣主簿累遷尚書工部郎中為龍圖閣待制

按范鎮撰
雍神道碑

作天章閣待制

陝西都轉運使還提舉諸司庫務勾當三班院

環原州屬羌擾邊以雍為安撫使建言屬羌因罪罰羊

者舊輸錢而比年責使出羊羗人頗以為患請輸錢如舊罪輕者以漢法贖金從之遷右諫議大夫權三司使雍在京東時平滑州水患以勞加龍圖閣直學士天聖六年拜樞密副使丁母憂起復遷給事中王清昭應宮災惟一二小殿存章獻太后有再葺之意雍抗言曰不若悉燔之也先朝以此竭天下之力遽為灰燼非出人意如入將葺之則民不堪命非所以畏天戒也時王曾亦諫阻乃止遷尚書禮部侍郎太后崩罷為戶部侍郎

知陝州改永興軍是歲飢疫關中為甚雍為賑恤以疾

請近郡逐歷知河陽進吏部侍郎徙應天府又改河南

府知資政殿學士陳安邊六事

按范仲淹換雍墓誌銘河陽暇日念國家禦戎

之備率多弛廢西羌狡狠必有窺邊之心恩不克威豈久安之勢乃感激上言而得入覲陳安邊六策據此則雍之陳安邊策在知河陽時非改知又請于天雄軍聚河南府後事也與宋史本傳互異

甲兵以備河北于永興軍河中府益募土兵以備陝西

即涇原環慶有警河中得以援之既而元昊反拜振武

軍節度使知延州元昊先遣人通款于雍雍信之不設

備一日引兵數萬破金明砦乘勝至城下會大將石元孫領兵出境守城者纔數百人雍召劉平于慶州帥師來援合元孫兵與賊戰三川口大敗皆為賊所執雍閉門堅守會夜大雪賊解去城得不陷左遷戶部侍郎知安州尋復吏部侍郎知河中府改知永興軍遷尚書左丞加資政殿大學士初完永興城或言非其便詔止其役雍匿詔而趣成之明年賊犯定州邠岐之間皆恐惟永興人心帖然復徙河南府遷禮部尚書卒贈太子太

師諡忠獻雍為治尚恕好謀而少成頗知人喜薦士位多至公卿者狄青為小校時坐法當斬雍貸之後果以功名顯云子宗傑歷陝西轉運使先雍卒宗傑子子奇子奇字中濟以祖雍廕簽書拜州判官歷遷湖南轉運副使建言梅山蠻恃險為邊患宜拓取之後章惇開五溪議由此起入判將作監使于遼導者改路回遠子奇謂曰此去雲中有直道旬日可至何為出此導者又欲沮子奇下馬館門外子奇曰異時于中門下馬今何以

輒易導者計屈歷河東陝西河北京東四路轉運使工部左司二郎中加直龍圖閣使河北諸郡猶權鹽秦罷之元祐初為司農卿歷知河陽召權戶部侍郎刪酒戶苛禁及奴婢告主給賞法未幾出知慶州廣儲蓄繕城柵嚴守備羈黠羌推誠待下人樂為用入為吏部侍郎以待制致仕卒年六十三子坦

坦字伯履以父任為開封府推官金部員外郎大理少卿改左司員外郎押伴夏國使應對合旨賜進士第權

起居舍人使遼復命具語錄以獻徽宗覽而善之付鴻臚令後奉使者視為式遼殿中監知開封府再命使遼時興邊議非時遣使以觀釁坦以不宜始禍辭其行帝怒責舒州團練副使稍復集賢殿修撰知江寧府洪楊二州召為戶部侍郎論當十及夾錫錢之弊以便親請外知河陽入辭帝曰夾錫錢之害甚於當十宜速正之為一道率坦至即奏罷之政和初復為戶部遂改當十錢為當三罷淮鹽入東北鬻諸州公田以實常平又疏

言戶部歲入有限用則無窮今節度使八十員留後至
刺史數千員自非軍功得之宜減其半奉及他工技未
作一切裁損時以為當時張商英為相坦多與之合及
商英去位言者論坦助為匱竭之說以搖衆聽又言坦
建議鬻田改常平法廢元符令及罷夾錫錢之罪貶黃
州團練副使安置韶州以赦復徽猷閣待制卒年六十
二

趙禎字表微其先單父人後徙宣城為人誠質寬厚少

好學擢進士第歷平定軍判官累遷殿中侍御史益州
路轉運使數言部中事以平允稱遷工部郎中召為侍
御史知雜事改三司鹽鐵副使擢右諫議大夫集賢院
學士知益州坐市錦不如數降知同州徙鳳翔京兆府
三遷工部侍郎復糾察在京刑獄加樞密直學士知并
州代還遷刑部侍郎天聖八年擢樞密副使遷吏部侍
郎時權出宮掖禎厚結劉美人家婢以故致位政府命
未出人馳告禎禎問曰東頭西頭蓋意在中書也聞者

皆以為笑章獻太后崩罷為尚書左丞知河中府遷禮部尚書以太子少傅致仕卒贈太子太保諡僖質

任布字應之河南人後唐宰相圜四世孫也力學家貧嘗從人借書以讀進士及第補安肅軍判官輒刺問契丹中書上疏請飭邊備仍奏河北利害後契丹至澶淵真宗識其名特改大理寺丞知安陽縣通判嘉州歷判大名府領湖南路提點刑獄入權三司鹽鐵判官判度支勾院京城東南有泉涌出為築祥源觀男女徒跣奔

走膽拜布論之曰明朝不宜以神怪銜愚俗遂忤宰相
意又與徐奭麻溫共試開封府進士而奭潛發封卷視
之降監鄧州稅徙知宿州時越州守闕寇準曰越州有
職分田歲入且厚今爭者頗重非廉士莫可予乃徙越
州及準貶布亦徙建州累遷尚書職方員外郎丁謂既
逐稍用為白波發運使歲餘判三司開拆司出為梓州
路轉運使富順監鹽井歲久鹵薄而課存主者至破產
或鬻子孫不能償布奏除之遷祠部郎中擢江淮制置

發運使前使者多聚山海珍異之物以餉權要布一切
罷去召為三司度支副使奉使契丹還累拜右諫議大
夫知真定府或欲省河北兵布言契丹西夏方窺伺中
國備未可弛也又築甬道屬滹沱河跨絕泥濘徠知滑
州改天雄軍遷給事中集賢院學士知許州進龍圖閣
直學士歷知河南府未至召為樞密副使布純約自守
及秉政無所建明子遜嘗上書諷大臣及布皆為不才
御史魚周詢因疏奏布不才其子能知之乃以尚書工

部侍郎罷知河陽議者以周詢引遜語逐其父為不知體復改蔡州授太子少保致仕進少傅皇祐間賜一子進士出身遷少師卒贈太子太傅諡忠惠子達性亦恬遠歷官為司封郎中

高若訥字敏之并州榆次人徙家衛州進士及第補彰德軍節度推官改秘書省著作佐郎再遷太常博士知商河縣縣有職分田而牛與種皆假于民若訥獨廢不耕人以為清入為監察御史裏行歷遷知諫院時范仲

淹坐言事奪職知睦州余靖尹洙論救仲淹相繼貶斥
歐陽修乃移書責若訥為諫官不能辨猶以面目見士
大夫出入朝廷是不復知人間有羞恥事若訥恣以其
書奏貶修夷陵令遂為時論所薄未幾加直史館以刑
部員外郎兼侍御史知雜事王蒙正知蔡州若訥言蒙
正起裨販因緣戚里得官向徙郴州物論猶不平不可
予以大州詔寢其命大慶殿設祈福道場若訥奏大慶
殿非行禮不御非法服不坐國之路寢也豈可聚老釋

為瀆慢閭文應為入內都知若訥言其肆橫不法請出之乃出文應為相州兵馬鈐轄又奏三公坐而論道今二府對纔數刻何以盡萬幾宜賜坐從容如唐延英故事擢天章閣待制累遷右諫議大夫權御史中丞時宰相賈昌朝與叅知政事吳育數爭事帝前明年春大旱帝詢所以若訥曰陰陽不和責在宰相遂引洪範以為大臣不肅則雨不時若于是昌朝及育皆罷若訥遂代育為樞密副使王則反貝州討之踰月未下或議招降

若訥言河朔重兵所積今釋不討且啓亂階議乃定以
工部侍郎叅知政事拜樞密使凡內降恩若訥多覆奏
不行入內都知王守忠欲得節度使固執以為不可皇
祐五年罷為觀文殿學士兼翰林侍讀學士尚書左丞
同羣牧制置使判尚書都省止命舍人草詞卒贈右僕
射諡文莊若訥強學善記尤喜申韓管子之書皇祐中
詔累黍定尺以制鍾律爭論連年不決若訥以漢貨泉
度一寸依隋書定尺十五種上之并損益祠祭服器悉

見施用

孫沔字元規越州會稽人中進士補趙州司理叅軍跌
蕩自放不守士節然材猛過人後以祕書丞為監察御
史裏行景祐元年禮院奏用冬至日冊後沔奏喪未祥
禪而行嘉禮非制也同安縣尉李安世上書指切朝政
被劾沔言若加罪安世恐杜天下言者請勿治黜知衡
山縣就道後上書言時事再貶永州監酒移通判潭州
知處州遷監察御史又知楚州所在皆著能迹召為左

正言論事益有直名遷尚書工部員外郎提舉兩浙刑
獄遂以起居舍人歷陝西轉運使時宰相呂夷簡求罷
帝優詔弗許沔上書言夷簡當國黜忠言廢直道及以
使相出鎮許昌召還秉政于茲三年不更一事以姑息
為安以避謗為智默默而去無一言啓沃帝心別白賢
不肖雖盡南山之竹不足書其罪也書聞帝不之罪議
者喜其謇切未幾以天章閣待制為都轉運使又遷禮
部郎中歷環慶路都總管安撫經畧使知慶州元昊死

諸將欲乘其隙大舉滅之沔言乘危伐喪非中國體歷知陝州河東都轉運使又知慶州聚戰亡遺骸葬祭之軍中感泣凡三知慶州邊人服其能歷遷龍圖閣直學士又遷樞密直學士知成都府未至以母喪罷服除為陝西都轉運使求知明州會京東多盜乃知徐州沔明購賞嚴誅罰盜遂止徙秦州時儂智高反沔入見帝以秦州事勉之對曰秦州不足煩聖慮陛下當以嶺南為憂臣聞智高掠邕廣賊勢方張官軍朝夕當有敗秦明

日嶺南以敗聞帝諭執政曰誠如沔所料宰相龐籍奏
遣沔行遂以為湖南江西路安撫使以便宜從事加廣

南東西路安撫使沔請益發騎兵

按宋史仁宗本紀皇祐四年八月命孫沔

為湖南江西路安撫使沔請益發騎兵行至鼎州始有加廣南安撫之命與本傳載廣南安撫在益發騎兵之

前五

且增選偏裨二十八人求武庫精甲五千以備賊

叅知政事梁適詆其張皇沔曰前日惟亡備故至此今
指期滅賊非可以徼倖勝乃欲示鎮靜耶夫實備不至
而貌為鎮靜危亡之道也居二日促行才與兵七百沔

憂賊渡嶺而北乃檄湖南北曰大兵且至其繕治營壘
多具宴犒賊疑不敢北寇尋加廣南東西路安撫使會
遣狄青為宣撫使沔副青宣撫賊平沔留治後事遷給
事中及還知杭州至南京召為樞密副使張貴妃薨追
冊為皇后命沔讀冊故事正后翰林學士讀冊沔既陳
不可用宰相護葬且陛下若以臣沔讀冊則可以樞密
副使讀冊則不可遂求罷職以資政殿學士知杭州遷
大學士徙知青州又遷觀文殿學士知并州而諫官吳

及御史沈起奏汚淫縱無檢守杭及并所為不法乃徙
壽州按驗得實責寧國軍節度副使後復光祿卿分司
南京會恩除知濠州以尚書禮部侍郎致仕英宗即位
遷戶部帝與執政議守邊者難其人叅知政事歐陽修
奏汚向守環慶養練士卒招撫蕃夷恩信最著今雖七
十精力不衰中間曾以罪廢然宜棄瑕使過遂起為資
政殿學士知河中府又為觀文殿學士知慶州歷徙延
州道卒贈兵部尚書諡曰威敏

按宋史本傳不載汚
贈諡據東都事略補

汚

居官有材力性强直少所憚然喜宴遊女色故中間坐廢初陝西用兵朝廷多假邊帥倚以集事近臣出帥或驕恣越法及沔廢後真定路安撫使呂溱相繼得罪自此守帥之權微矣

欽定四庫全書

欽定續通志卷三百二十五

列傳

宋 二十九

高瓊

繼勳
繼宣

范廷召

葛霸

懷敏

曹利用

孫繼鄩

張耆

希一
利一

楊崇勳

夏守贇

隨

狄青

張玉
孫節

郭達

高瓊字寶臣

據王珪撰瓊
神道碑增

燕人祖霸父乾

按神道碑曾
祖冕贈中書

令祖霸贈尚書令密國公

父乾贈尚書令冀國公

李景殺霸乾徙居亳州之蒙

城因土著焉瓊少勇鷙無賴為盜事敗將磔於市值暑

雨創潰伺守者稍怠即掣釘而遁事王審琦太宗尹京

邑知其才勇召置帳下太宗嘗侍宴禁中甚醉及退太

祖送至苑門時瓊與載興王超李斌桑贊從瓊左手執

勒右手執鎧太宗乃能乘馬太祖顧瓊等壯之因賜以

控鶴官衣帶及罷帛且勅令盡心焉太宗即位擢御龍

直指揮使從征太原命押弓弩兩班合圍攻城及討幽

蒯屬車駕倍道還瓊與軍中鼓吹殿後六班扈從不及
惟瓊首率所部見行在太宗大悅慰勞之太平興國四
年遷天武都指揮使領西州刺史明年改領本州團練
使車駕巡師大名命瓊與日騎石廂都指揮使朱守節
分為京城内巡檢坐事出為許州馬步軍都指揮使神
通碑會盧多遜遣吏私通秦王卹坐神
失徵巡降許州馬步軍都指揮使神
會有龍騎亡命卒
數十人因知州臧丙出郊謀劫其導從以叛瓊聞即白
丙趣還城因自率從卒數十人遂悉擒送於州丙上其

事會將北伐召入授馬步軍都軍頭領荊州刺史樓船
戰擢都指揮使部船千艘赴雄州又城益州師還為天
武右廂都指揮使領本州團練使端拱初出為單州防
禦使改貝州部署二年遷朔易帥臣制授瓊侍衛步軍
都指揮使領歸義軍節度出為并代馬步軍都部署戍
兵有以廩食陳腐譁言者瓊知之一日出巡諸營士卒
方聚食因取其飯自啖之謂衆曰今邊鄙無警爾等坐
飽甘豐宜知幸也衆言遂息改鎮州都部署至道中就

改保大軍節度典軍如故真宗即位加彰信軍節度復
為并代都部署咸平中契丹侵邊其母車帳至狼山大
夏帝親巡河朔遣楊允恭馳往召瓊率所部出土門與
石保吉會鎮定既而傳潛以逗留得罪即召瓊代之兵
罷復還本任轉運使言其政績詔褒之三年代還以手
劄不任持笏詔執挺入謁授殿前都指揮使先是范廷
召桑贊所將邊兵臨敵退衄言者請罪之帝以問瓊瓊
對曰兵違將令於法當誅然陛下去歲已釋其罪今復

行之又方屯諸路非時代易臣恐衆心疑懼乃止景德
初車駕北巡時前軍已與敵接戰帝欲親臨營壘或勸
南還瓊曰敵師已老陛下宜親往以督其成帝悅即日
進幸澶淵明年以罷兵料簡兵卒諸班直十年者出補
軍校年老者退為本班刺員瓊進曰此非激勸之道宿
衛豈不勞乎自是八年者皆得叙補焉馬軍都校葛霸
權步軍司會以疾在告令瓊兼領二司瓊從容上言曰臣
衰老儻又有犬馬之疾則須一將總此二職臣事先朝

時侍衛都虞候以上常至十員職位相亞易於遷改且使軍伍熟其名望邊藩緩急亦可選用帝深然之未幾以久疾求解兵柄授檢校太尉忠武軍節度三年卒年七十二贈侍中嘉祐八年瓊曾孫女進冊為皇后累贈瓊太師尚書令兼中書令泰國公治平四年為皇太后贈至衛王諡曰烈武神宗篆其碑曰決策定難顯忠基慶之碑

按瓊累贈官爵及諡號碑額宋史本傳不載據神道碑補

瓊不識字曉達軍

政然頗自任罕與諸將參議善訓諸子繼勲繼宣繼忠

繼密繼和繼隆繼元繼勲繼宣最知名

按神道碑載瓊子十四人俱有

官身宋史本傳止載七人

繼勲字紹先初補右班殿直儀狀頗偉太宗見而異之
召問其家世以瓊子對擢寄班祇候累遷內殿崇班咸
平初王均據益州命為益州兵馬都監提舉西川諸州
軍巡檢公事招安使雷有終以兵五百授繼勲守東郭
二門會賊攻彌牟砦繼勲引兵轉鬪至嘉州敗之有終
益以勁兵復進攻二門克之乃建幟城上諸將知城拔

有終乃引軍薄天長門賊復來拒戰會日暮有終欲少
休繼勲曰賊窘矣急擊之無失也率十數騎鏖戰身被
數創血濡甲馬死更馬以進會入內都知秦翰來援賊
退保子城不敢出繼勲潛知賊欲夜遁開圍使得潰去
均卒敗滅以功遷崇義使賊餘黨保山數中時出剽劫
乃徙綿漢劔門路都巡檢使繼勲募惡少年偵賊動靜
窮躡巖穴掩其不備悉擒殺之又徙峽路兵馬鈐轄還
朝遷洛苑使并代州鈐轄徙屯岢嵐軍犇丹聚兵五萬

屯草城川繼勲登高望之謂軍使賈宗曰敵雖衆而陣不整將不才也我兵雖少可以奇取勝先設伏山下與之戰至寒光嶺伏發契丹大敗斬獲甚衆遷弓箭庫使領滎州刺史徙麟府州鈐轄時屯兵河外饋運不屬繼勲扼免毛川援送軍食師乃濟徙知環州又徙瀛州奉使契丹還知定州徙鄜延路鈐轄坐市馬虧價失官已而復知瀛州仁宗即位真授隴州團練使歷知雄州其冬契丹獵燕薊侯卒報有兵入鈔邊州皆警繼勲曰契丹

歲賴漢金繒何敢捐盟好邪居自若已乃知渤海人叛契丹行剽兩界也累擢涇原路副都總管兼知渭州入宿衛出為天雄軍都總管願復護邊既而留不遣後為真定府定州路都總管改威武軍節度觀察留後遂拜保順軍節度使馬軍副都指揮使恭謝禮成徙鎮昭信以老病乞骸骨召見便殿許一子扶掖聽辭管軍改鎮建雄知滑州河水暴溢齧堤岸繼勲雖老躬自督役露坐河上暮夜猶不輟水乃殺怒滑人德之卒年七十八

贈太尉繼勳性謙謹有機略善撫御士卒臨戰輒勝在蜀有威名號神將子遵甫官至北作坊副使嘉祐八年遵甫女正位皇后神宗即位冊皇太后累贈繼勳太師尚書令兼中書令追封康王謚穆武熙寧九年詔宰相王珪為神道碑御篆碑首曰克勤敏功鍾慶之碑遵甫亦贈太師尚書令兼中書令追封楚王

按東都事畧載繼勳贈楚王遵甫

甫贈魯王王珪撰繼勳神道碑載繼勳贈康王遵甫贈武功郡王與宋史本傳互異

繼宣字舜舉幼善騎射頗工筆札知讀書以恩補西頭

供奉官遷閣門祇候邠州兵馬都監曹瑋守邠數與言
兵薦其可用乾興初以內殿崇班為益州都監蜀人富
侈元夕大張燈知府薛奎戒以備盜繼宣籍惡少年飲
牒之使夜中潛誌盜皆明日皆獲歷益州路兵馬鈐轄
還為西上閣門使涇原路鈐轄兼安撫使知渭州遷四
方館使昭州刺史知雄州初元昊反聲言侵闕隴繼宣
請備麟府未幾羌兵果入寇河外陷豐州擢捧日天武
四廂都指揮使恩州團練使知并州俄元昊寇麟府繼

宣帥兵營陵井進屯府谷間遣勇士夜亂賊營又募黥配廂軍得二千餘人號清邊軍命偏將王凱主之軍次三松嶺賊卒數萬衆圍會清邊軍奮起大敗之築寧遠砦相視地脉鑿石出泉已而城五砦遷眉州防禦使卒

范廷召冀州棗強人父鐸為里中惡少年所害廷召年十八手刃父讐剖取其心以祭父墓弱冠身長七尺餘有膂力嘗為盜以勇壯聞周廣順初應募為北面招收指揮使世宗即位入補衛士從征高平力戰遷殿前指

揮使又從征淮南戰紫金山流矢中左股太祖即位從
平李筠李重進轉本班都知又從征太原再轉散都頭
都虞候領費州刺史太平興國中以日騎軍都指揮
使從平太原征范陽秦王廷美嘗遣親吏閻懷忠趙瓊
攜禁軍列校廷召與馬坐出為唐州馬步軍都指揮使
雍熙三年議北征召入為馬步軍都軍頭領平州刺史
幽州道前軍先鋒都指揮使與賊遇固安南破其衆三
千斬首千餘級克固安新城二縣乘勝下涿州復與契

丹戰中流矢血漬甲縷神色自若督戰益急師還遷日
騎右廂都指揮使領本州團練使又遷左廂移領高州
端拱二年累授殿前都虞候領涼州觀察使鎮州副都
部署大破契丹三萬衆於徐河斬首數千級淳化二年
為平虜橋砦都部署歷并代環慶兩路副部署至道中
遣將分五路討李繼遷命廷召副李繼隆為環慶靈都
部署廷召出延州諸將失期獨廷召與王超大小數十
戰屢克捷帝嘉之俄又為并代兩路都部署三年遷侍

衛馬軍都指揮使領河西軍節度為定州行營都部署
咸平二年契丹入塞車駕北巡廷召與戰於瀛州西大
敗之遂北至莫州東三十里又斬獲甚衆契丹遁去師
還錄功加檢校太傅益賦邑又改殿前都指揮使四年
卒年七十五贈侍中廷召在軍四十餘年由顯德以來
凡親征未嘗不從善騎射嘗出獵有羣鳥飛過廷召發
矢並貫其三觀者駭異子守均至散員都虞候濱州刺
史守信內殿承制閤門祇候守宣內殿崇班守慶更名

珪後為西京作坊副使淮南江浙荆湖制置發運副使
葛霸真定人姿表雄毅善擊刺騎射始事太宗於藩邸
太宗即位補殿前指揮使累遷散員都虞候雍熙中幽
州之師失律大補軍校以霸為驍騎軍都指揮使領檀
州刺史戍定州嘗遇契丹於唐河與戰敗走之斬獲甚
衆俄召為御前忠佐馬步軍都軍頭端拱初出為博州
團練使歷潞代二州部署淳化元年擢殿前都虞候領
澶州觀察使為高陽關副都部署進都部署凡七戰召

還制授保順軍節度典軍如故出為鎮州都部署徙鎮
天雄咸平中帝勞師於大名霸與石保吉同來覲時康
保裔沒於河間即日以霸為貝冀高陽關前軍行營都
部署就遷副都指揮使未幾改邠寧涇原環慶三路都
部署四年遷侍衛馬軍都指揮使領感德軍節度景德
初河決澶州橫隴埽命為修河都部署未行屬契丹侵
邊帝議親征副李繼隆為駕前東面排陣使駐澶州明
年召還以功特加封邑上言朝廷居明德心喪尚過音

樂請停迎授之制奏可是年以霸久典兵年且老罷軍
職乃授昭德軍節度出為并代都部署時廷臣有隸麾
下者頗擾軍民霸昏耄為所罔真宗知之故有是召四
年徙知耀州霸雖懦然能謹直自持卒年七十五贈太
尉子懷信至如京副使懷煦內殿承制懷正博州團練
使知滄莫二州

懷敏以蔭授西頭供奉官加閣門祇候歷知隰莫保三
州累遷康州刺史知雄州就遷西上閣門使上平燕策

會歲旱塘水涸懷敏慮契丹使至測知其廣深乃擁界河水注之塘復如故召對邊事復還雄州改萊州團練使濁流砦兵叛殺官吏清去懷敏發兵掩襲盡誅其黨徙滄州懷敏為王德用妹壻德用貶亦降知滁州陝西用兵起為涇原路馬步軍副總管兼涇原秦鳳兩路經略安撫副使既入對以曹瑋嘗所被介冑賜之令制置鄜延環慶兩路存廢砦柵遷鄜延路副都總管進殿前都虞候知延州范仲淹言其猾懦不知兵復徙涇原路

兼招討經略安撫副使慶厯二年元昊寇鎮戎軍懷敏
出瓦亭砦督諸砦兵禦敵與諸將會兵養馬城聞元昊
徙軍新壕外懷敏議質明襲之乃分諸將為四路趣定
州砦緣邊都巡檢使劉湛向進行次趙福堡遇敵戰不
勝保向家峽懷敏使涇原路都監趙珣知鎮戎軍曹英
并鎮戎軍西路巡檢李良臣孟淵援之俄報敵已拔柵
踰邊壕懷敏入保定川砦敵毀板橋斷其歸路別為二
十四道以過軍環圍之又絕定川水泉上流以饑渴其

衆環度路都監劉賀率蕃兵鬪於河西不勝餘衆潰去
懷敏為中軍屯塞門東偏曹英等又敗於塞之東北隅
英面被流矢仆壕中懷敏所部兵見之奔駭懷敏為衆
蹂躪幾死與致瓮城久之乃蘇復選士據門橋揮手刃
以拒入城者趙珣等以騎軍四合禦敵敵衆稍却然大
軍無鬪志珣馳入勸懷敏還軍中是夕敵遂舉火圍城
四隅懷敏夜召諸將謀質明結陣走鎮戎軍因諭其親
軍左右及在後者皆毋得動平明從吾往安西堡以英

珣為先鋒賀思純為左右翼知和為殿聽中軍鼓乃得行至卯鼓未作懷敏先上馬而大軍按堵未動懷敏周麾者再將徑去有執轡者勸不可懷敏不得已乃還使叅謀郭京等取鵠城中未至懷敏復上馬叱執轡者使去馭者又不聽拔劍將擊之士卒遂散懷敏驅馬東南馳二百里至長城濠路已斷敵周圍之遂與諸將皆遇害餘軍九千四百餘人馬六百餘匹為敵所斷其子宗晟與趙正郭京承受王昭明等還保定川初懷敏令軍

中步兵毋得動及前陣已去後軍多不知者故皆得存
時韓質郝從政胡息以兵六千保蓮華堡劉湛向進兵
一千保向家峽皆不赴援於是敵長驅抵渭川幅員六
七百里焚蕩廬舍屠掠民畜而去奏至帝嗟悼久之贈
懷敏鎮戎軍節度使兼太尉同時戰沒者皆贈官有差
復降向進等官落郝從政趙瑜職懷敏通時事善候人
情故多以才薦之及用為將而輕率昧於應變遂至覆
軍帝念之賜謚忠隱子宗晟宗壽宗禮宗師皆遷官

曹利用字用之趙州寧晉人父諫擢明經第官崇儀使
利用慷慨有志操諫卒補殿前承旨改右班殿直遷廊
延路走馬承受公事景德元年契丹侵河北帝幸澶州
射殺契丹大將達蘭契丹欲收兵去使王繼忠議和擇
可使契丹者時利用遣奏事行在樞密院請以利用應
選帝曰此重事也毋輕用人明日樞密使王繼英又薦

利用遂授閤門祗候假崇儀副使奉書詣契丹軍

按宋史真

宗本紀載契丹遣李興附王繼忠密表請和及曹利用
使契丹在景德元年十月時契丹雖請和猶攻瀛莫諸

州十一月帝始親征契丹國志亦云真宗親駕澶淵是時利用之書已通據此則繼忠議和及利用使契丹非真宗幸澶淵後事也遼史聖宗本紀載繼忠議和亦在師未次澶淵之先利用來請和則在師次澶淵後所載

互異

帝語利用曰契丹南來不求地則邀賂爾關南地歸

中國已久不可許漢以玉帛賜單于有故事利用對曰彼若妄有所求臣不敢生還帝壯其言利用馳至軍中
契丹主母見利用果議關南地利用拒之遣其臣韓杞
來報命利用再使契丹契丹主母曰晉德我畀我關南
地周世宗取之今宜還我利用曰晉人以地畀契丹周

人取之我朝不知也若歲求金帛以佐軍尚不知帝意可否割地之請利用不敢以聞其政事舍人高正始遽前曰我引衆以來圖復故地若止得金帛歸則愧吾國人矣利用曰子盍為契丹熟計使契丹用子言恐連兵結讐不息非國利也契丹度不可屈和議遂定利用奉約書以歸擢東上閤門使忠州刺史契丹遣使來聘遂命利用迎勞之知宜州劉永規馭下殘酷軍校陳進乘衆怨殺永規叛陷柳城縣圍象州掠廣州嶺南騷動帝

謂輔臣曰朕固憂遠方守將非其人以起邊釁今果然
曹利用曉方略盡心於事其以為廣南安撫使嶺南平
遷引進使歷客省使嘉州防禦使大中祥符七年拜樞
密副使加宣徽北院使天禧元年同知樞密院事二年
進知樞密院事遂拜樞密使四年同中書門下平章事
利用在位既久頗恃功初輔臣丁謂李迪爭論帝前迪
斥謂姦邪因言利用與之為朋黨利用曰以片文遇主
臣不如迪捐軀以入不測之敵迪不逮臣迪坐是免而

利用以檢校太師兼太子少保為會靈觀使進尚書右僕射封韓國公乾興初加左僕射兼侍中武寧軍節度使景靈宮使進魯國公詔如曹彬給公使錢歲萬緡帛丹使者肅從順桀驚稱疾留館下不時發朝廷遣使問勞相望於道利用請一切罷之從順乃引去天聖三年

加司空五年改封鄆國公

樞東都事略載利用進尚書右僕射封韓國公乾興元年

進封魯國公天聖五年改封鄆國公宋史本傳俱失載今據補

章獻太后臨朝入人與

貴戚稍能軒輊為禍福而利用以勲舊自居不恤也凡

內降恩力持不予左右多怨太后亦嚴憚之稱曰侍中而不名利用奏事簾前頗不祇肅或以指爪擊帶跽左右指以示太后曰利用在先帝前何敢爾耶太后領之利用又奏抑內降恩難屢却亦有不得已從之者人以此是讒之或給太后曰蒙恩得內降輒不從今利用家媼陰諾臣請其必可得矣下之而驗太后始疑其私頗銜怒內侍羅從勲得罪太后使利用召崇勲戒敕之利用去崇勲冠幘詬斥良久崇勲恨之會其從子汭為趙州

兵馬監押州民趙德崇詣闕告汭不法事奏上崇勲請
往按治遂窮探其獄汭坐被酒衣黃衣令人呼萬歲杖
死初汭事起即罷利用樞密使加兼侍中判鄧州及汭
誅謫左千牛衛將軍知隨州又坐私貸景靈宮公錢貶
崇信軍節度副使房州安置命內侍楊懷敏護送諸子
各奪二官沒所賜第籍其貲然親屬十餘人宦者多惡
利用行至襄陽驛懷敏以語逼之利用遂投繯而絕以
暴卒聞後其家請居鄧州帝惻然許之命其子內殿崇

班淵監本州稅明道二年追復節度兼侍中後贈太傅
還諸子官賜諡襄悼命學士趙槩作神道碑帝為篆其
額曰旌功之碑詔歸所沒舊產利用性悍梗少通力裁
僥倖而其親舊或有因緣以進者故及於禍然在朝廷
忠蓋有守始終不少屈死非其罪天下寃之

孫繼鄴字元嗣其先金陵人祖謙事李昇為長劍都指
揮使南伐閩援兵不至戰死父承睿時為小校憤將兵
者不如期致其父沒乃刺殺之亡去轉徙淮楚間久之

入京師以策上太宗授左班殿直終左藏庫使繼鄴初以三班奉職監涿陽酒稅會宜州陳進反曹利用辟以自隨為前驅破賊於象州大烏嶺以功遷左侍禁改西頭供奉官是迺薦為閤門祗候上禦戎策十數事又用曹瑋薦為鄜延路兵馬都監徙知環州累遷崇儀副使會修築洪德砦與總兵者論事不協絀為冀州兵馬都監起知保安軍徙涇州使契丹樞密使曹利用欲用之繼鄴惡其權盛陰知利用將有禍數以疾辭遂除左龍

武軍統軍致仕利用貶復為崇儀副使累遷西上閤門
使出為環慶路副都總管道改涇原路兼知渭州建言
蕭關故道前控大川善水草敵騎所從出也誠得屬羌
與奉賜且羈其酋領使為藩籬則可無西顧憂矣為步
軍都虞候徙真定路卒

張耆字元弼開封人年十一給事真宗藩邸及即位授
西頭供奉官嘗與石知顥侍射苑中連發中的擢供備
庫副使帶御器械咸平中契丹侵邊以功遷南作坊使

昭州刺史天雄軍兵馬鈐轄邊兵未解徙鎮州行營鈐
轄又徙定州昇丹圍望都者與諸將從間道往援比至
城已陷者與敵戰身被數創斬其梟將遲明復戰會王
繼忠為昇丹所執者還請大舉討之輔臣以為不可遷
昭州團練使并代州鈐轄明年昇丹兵復入帝欲親征
者奏邊事十餘條多論兵貴持重及所以取勝者召還
入對帝曰卿嘗北伐昇丹入塞與卿所請興師之日同
悔不用卿策今領守澶州而未得人如何者請行帝喜

命為駕前西面鈐轄令至澶州候契丹遠近者馳騎往
改東面排陣鈐轄事平會曹州趙諫告者受金為人求
薦禮部貶供備庫使潞州都監久之事稍辦復官管勾
皇城司帝以耆歷河東稔邊事召耆問地里險易狀耆
因言雲應蔚朔四郡間遣人以文移至并代間非覘邊
虛實即欲熟道路宜密諭代州使自雲應蔚至者由大
石谷入自朔至者由士塏入餘間道皆塞之以示險遠
英州防禦使侍衛親軍馬軍都虞候從帝東封遷絳州

防禦使

東都事略作齊州防禦使

殿前都虞候時建王清宮者疏言

謂殫國財力以興土木之役非所以承天意歷遷威塞

軍節度使進宣徽南院使兼樞密副使罷判河陽天禧

二年徙鎮武寧拜同中書門下平章事判陳州累歷鎮

安軍淮南節度使判壽州召為樞密使兼羣牧制置使

封岐國公

按者封岐國公宋史本傳失載據東都事略補

會靈觀使先名旻至

是表改名者加尚書左僕射兼侍中歷河陽三城泰寧

山南東道昭德四鎮節度使

按東都事畧載者為泰寧山南東道昭德三鎮節度

並在拜樞密使後其為河陽三城節度
則在拜樞密使之前與宋史本傳互異
進兼侍中封鄧

國公章獻太后崩以左僕射改鎮護國出判許州移襄
鄧孟許陳壽六州進封徐國公耆為人重密有智數章
獻太后微時嘗寓其家耆事之甚謹及太后預政寵遇
最厚安佚富盛踰四十年所歷藩鎮人頗以為優以太
子太師致仕卒贈太師兼侍中諡榮僖子二十四人希
一利一名最著

希一字簡翁以父耆任歷官河北緣邊安撫副使請徙

邊兵內地以寬糴費每州歲為市平以糴邊穀使人不能高下其價戍卒之孥給糧先軍士一日使其家為伍保坐以逃亡之累皆著為法徙成都利州路鈐轄真定府路總管累使契丹契丹嘗以雄州不當禁漁界河及役白溝兩屬民為言希一曰界河之禁起於大國統和中今文移尚存白溝本輸中國田租我太宗特除之自是大國侵牟立稅故名兩屬惡有中國不役之理契丹語塞以均州防禦使卒第利一

利一字和叔以蔭補供奉官歷河北緣邊安撫都監兼
閤門通事舍人知廣信軍謀告契丹侵邊利一置酒高
會於譙門敵率衆遁去徙知保州雄州契丹刺兩屬民
為兵民不堪其辱利一綏來之有大姓舉族南徙慕而
來者至二萬利一發廩振恤且移詰涿州自是不敢復
刺終雄州團練使

楊崇勳字寶臣薊州人祖守斌事太祖為龍捷指揮使
父全美事太宗為殿前指揮使崇勳以父任為東西班

承旨事真宗於東宮帝嘗曰聞若嗜學吾授若書崇勲自是稍通兵法及前代興廢之事真宗即位遷左侍禁累遷樞密都承旨改客省使領羣牧使帝久不豫寇準罷相入內副都知周懷政謀奉帝為太上皇傳位太子復相準嘗以謀訪崇勲崇勲告其事遂誅懷政擢崇勲鄧州觀察使不拜乃以內客省使領桂州觀察使復兼羣牧使初羣牧置使皆以文臣領之崇勲曰馬者戰備雖無事可去邪仁宗即位以彰德軍節度觀察留後知

陳州歷授殿前都指揮使領鎮武軍節度使拜宣徽南院使兼樞密副使又歷鎮南定武軍山南東道三鎮節

度使

按宋史宰相表及東都事略載崇勲為鎮南軍節度使在拜宣徽使之前與宋史本傳互異

章

獻與仁宗言先帝最稱崇勲質信可任大事乃進樞密

使明道二年加同平章事以河陽三城節度使判陳州

景祐初懷政之弟懷信訟崇勲誣告其兄遂罷同平章

事歷知壽亳陳三州契丹將渝盟朝擇將備邊崇勲請

行復拜同平章事判定州既而老不任事徙成德軍又

徙鄭州坐其子宗誨納賕枉法以左衛上將軍致仕改
太子太保卒贈太尉謚恭密尋改謚恭毅崇勲性貪鄙
久任軍職當真宗時每對輒肆言中外事喜中傷人人
以是畏之

按宋史此下有夏守恩傳
已附見守贇傳中今從刪

夏守贇字子美并州榆次人父遇為武騎軍校與契丹
戰沒兄守恩給事真宗襄王邸王問其兄弟守恩言守
贇四歲而孤日侍王邸不得時撫養心輒念之王為動
容即日召入宮而憐其幼聰就外舍後二年復召入王

乳母齊國夫人使傳婢拊視之稍長習通文字王為太子守貲典工作事及即位授右侍禁李繼遷叛命使綏夏伺邊釁遷西頭供奉官寄班祇候康保裔與賊戰沒部曲畏誅聲言保裔降賊密詔守貲往察之廉問得狀還奏詔恤保裔家帝幸澶淵及祀汾陰為駕前巡檢從幸亳州命修行宮轉崇儀使提舉倉草場帝甚親信遣中使問守貲曰欲管軍乎為橫行使乎守貲曰臣得日近冕旒足矣尋遷西上閣門使提舉諸司庫務以右千

牛衛大將軍昭州敕史為樞密都承旨兼領三班院凡十餘年累遷步軍馬軍殿前副都指揮使建武鎮東保大軍節度使進殿前都指揮使徙鎮定國守恩生賊廢守贊亦以鎮海軍節度使罷管軍之本鎮踰年徙定州路都總管召知樞密院事既入見帝問西事守贊言平時小障屯兵馬不及千餘賊兵盛至固守不暇安能出關宜併兵以據衝要伺便邀擊功或可成帝然之劉平石元孫敗人有以降賊誣告者守贊頗辨其枉引康保裔事為質因自請將兵擊賊換宣徽南院使

陝西馬步軍都總管兼經略安撫緣邊招討使然守贊
性庸怯寡方略不為士卒所服尋詔駐軍河中居數月
徙屯鄜州其子隨為陝西緣邊招討副使時晏殊宋綬
知樞密院又召守贊同知院事隨卒守贊請罷以宣徽
南院使天平軍節度使歷判相州復為真定府定州等
路都總管未至徙高陽關都總管就判瀛州卒贈太尉
謚忠僖

隨字君正頗好儒術多從士大夫游以父蔭為茶酒班

殿侍遷右班殿直仁宗即位除內殿承制閣門祇候累遷秦州防禦使元昊反為鄜延路副都總管隨本名元亨與元昊有嫌因奏改焉尋徙環慶路未幾復還鄜延元昊為書及錦袍銀帶投境上以遺金明若都監李士彬且約與同叛候人得之諸將皆疑士彬獨隨曰此行間耳士彬與羌世仇若有私約通贈遺豈使衆知邪乃召士彬與飲厚撫之士彬感泣後數日果擊賊斬首獲羊馬自効及守貳知樞密院事耀州觀察使知亳州劉

平石元孫敗以隨知河中府守贇經略安撫陝西留領
會靈觀事守贇還復為陝西副都總管兼緣邊招討副
使帝曰朝廷方以邊事委卿卿母以父在機密為嫌時
隨已病次陝州卒贈昭信軍節度使謚莊恪隨在邊陲
無多戰功然慎重少過

狄青字漢臣汾州西河人善騎射初隸騎御馬直選為
散直寶元初趙元昊反詔擇衛士從邊以青為三班差
使殿侍延州指使時偏將屢為賊敗士卒多畏怯青勇

於臨敵常為先鋒凡四年前後大小二十五戰中流失者八破金湯城略省州羅密翠香摩諾爾桑羅沁七家口等族燔積聚數萬收其帳二千三百生口五千七百又城橋子谷築招安豐林新砦大郎等堡皆扼賊要害嘗戰安遠被創甚聞寇至即挺起馳赴衆爭前為用臨敵被髮帶銅面具出入賊中皆披靡莫敢當

謹按通鑑輯覽

御批青
面具
猛銳善戰所向披靡乃其勇畧使然非被髮
足以制勝史家艷稱其事洵為驚奇大實

尹洙為

經略判官青以指使見與談兵善之薦於經略使韓琦

范仲淹曰此良將材也二人一見竒之待遇甚厚仲淹
以左氏春秋授之曰將不知古今匹夫勇爾青折節讀
書悉通秦漢以來將帥兵法由是益知名以功累遷西
上閤門副使擢秦州刺史涇原路副都總管經略招討
副使帝以青數有戰功欲召見問方略會賊寇渭州命
圖形以進元昊稱臣徙真定路副都總管歷遷馬步軍副
都指揮使保大安遠二軍節度觀察留後青奮行伍十
餘年而貴是時面涅猶存

按文獻通考載宋沿五代兵制
諸軍悉黥面為字以識軍號胡

寅謂籍民為兵無罪而黜之乃至不仁者所為是也青自行伍顯責面涅猶存即其後不欲除去蓋以示不忘

云本帝嘗敕青傳藥除字青指其面曰陛下以功擢臣不

問門地臣所以有今日由此涅爾臣願留以勸軍中不

敢奉詔以彰化軍節度使知延州擢樞密副使皇祐中

廣源州蠻儂智高及陷邕州又破沿江九州圍廣州嶺

外騷動楊政等安撫經制蠻事

按宋史本傳作楊畧考宋史仁宗本紀及長編

並作皇佑四年六月命屯田員外郎直史館楊政安撫廣南經制蠻事以師久無功降知鄆州據此傳作楊略

誤今改師久無功又命孫沔余靖為安撫使討賊帝猶以

嶺南為憂青上表請行翌日入朝自言臣起行伍非戰
伐無以報國願得蕃落騎數百益以禁兵羈賊首致闕
下帝壯其言遂除宣徽南院使宣撫荆湖南北路經制廣
南盜賊事置酒垂拱殿以遣之時智高還據邕州青合
孫沔余靖兵次賓州先是將偕張忠皆輕敵敗死軍聲
大沮青戒諸將毋妄與賊鬪聽吾所為廣西鈐轄陳曙
乘青未至輒以步卒八千擊賊潰於崑崙關殿直袁用
等皆遁青曰令之不齊兵所以敗晨會諸將堂上揖曙

起并召用等三十人按以敗亡狀驅出軍門斬之沔靖相顧睥眄諸將股栗已而頓甲更令調十日糧衆莫測覘者還以為軍未即進青明日乃整軍騎一晝夜絕崑崙關出歸仁舖先布陣成列賊既失險遂悉衆出戰前鋒孫節搏賊死山下賊氣銳甚沔等懼失色青執白旗麾騎兵縱左右翼出賊不意大敗之追奔五十里斬首數千級其黨黃師宓儂建中智中及偽官屬死者五十七人生擒賊五百餘人智高夜縱火燒城遁去遲明青

按兵入城獲金帛鉅萬雜畜數千招復老壯七千二百
常為賊所俘脅者慰遣之梟黃師宓等邕州城下斂屍
築京觀於城北隅時賊屍有衣金龍衣者衆謂智高已
死欲以上聞青曰安知非詐耶寧失智高不敢誣朝廷
以貪功也復為樞密副使遷護國軍節度使河中尹還
至京師帝嘉其功拜樞密使優進諸子官秩始交趾願
出兵助討智高余靖言其可信具萬人糧於邕欽二州
待之詔以緡錢三萬賜交趾為兵費計賊平厚賞之青

至檄余靖無通使假兵即上奏曰李德政聲言將步兵
五萬騎一千赴援非其情實且假兵於外以除內寇非
我利也以一智高而橫蹂二廣力不能討乃假兵蠻夷
蠻夷貪得忘義因而啓亂何以禦之請罷交趾助兵從
之賊平人服其有遠略青在樞密四年每出士卒輒指
目以相矜誇又言者謂青家數有光怪請出青於外以
保全之不報嘉祐初京師大水青避水徙家相國寺行
止殿上人情頗疑廼罷青為同中書門下平章事出判

陳州明年疽發髭卒贈中書令謚武襄青為人慎密寡
言其計事必審中機會而後發行師先正部伍明賞罰
與士同饑寒勞苦雖敵猝犯之無一士敢後先者故其
出常有功尤喜推功與將佐始與孫沔破賊謀一出於
青賊既平經制餘事悉以諉沔退若不用意者沔始
歎其勇既又服其為人自以為不如也尹洙以敗死青
悉力調其家事子諮詠並為閭門使詠數有戰功熙寧
元年神宗考次近世將帥以青起行伍而名動中外深

沉有智略能以畏慎保全終始慨然思之命取青畫像
入禁中御製祭文遣使賫中牢祠其家

張玉字寶臣保定人以六班散直隸狄青麾下築青澗
招安砦遇夏兵三萬有馳鐵騎挑戰者玉單持鐵簡出
鬪取其首及馬軍中因號曰張鐵簡以狀聞仁宗曰真
勇將也以爲本路同巡檢從征儂智高抵歸仁驛賊列
三銳陳以逆官軍軍小邵玉率右廂突騎橫貫賊壘賊
大潰帝召見使作銳陳於殿廷下觀破賊之勢擢爲廣

西鈐轄徙大名進龍神四廂都指揮使為副都總管諒祚攻大順城玉以兵三千夜擊之驚潰而去累遷昭州防禦使徙涇原熙寧中慶州卒叛玉襲逐于石門卒窮蹙請降玉斬二百人坐奪職降為陵州團練使居數月復之王韶開熙河玉遷宣州觀察使為副都總管河北置三十七將以玉為第一將入為馬步軍都虞候卒贈建雄留後

孫節開封人少隸軍籍以才勇補右侍禁與狄青同在

延州數攻破敵若有功累遷西京左藏庫副使及青討
智高辟隸麾下至歸仁鋪節為前鋒直前搏戰賊銳甚
節廕山下俄中槍而沒特贈忠武軍節度留後封其妻
為仁壽郡君官其子二人從子三人給諸司副使奉終
其喪

郭達字仲通父斌自邢徙洛康定中兄遵死於敵錄達
為三班奉職隸西帥范仲淹麾下仲淹勉以問學延安
清剛社募兵誤殺熟羌將論死達請而免之活壯士十

三人時方議收靈武達言地遠而食不繼城大而兵不多未見其利未幾涇原任福以全軍敗没人服其先見陳執中安撫京東奏為駐泊將執中與賓佐論當今名將共推葛懷敏達曰懷敏他日必敗朝廷事執中始怒居數日問曰君何以知葛懷敏非名將而敗事邪曰喜功微幸徒勇無謀可擒也執中歎曰君真知兵懷敏既覆師矣為真定兵馬監押保州卒叛田況遣達况招之達與亂者侍其臻嘗同事范仲淹馳至城下示以舊所

佩紫囊臻識之即與其黨韋貴史克順邀達登城既見
申諭禍福衆或疑不即下曰若降恐不免達請以身為
質於是開城降以功加閤門祇候環慶兵馬都監歷涇
原都監拔古渭城轉通事舍人徙河北緣邊安撫都監
副吳奎使契丹會其主受尊號入觀禮使還黜為汾州
都監龐籍鎮河東俾權忻州契丹來求天地廟地籍不
能決以諉達達訪得太平興國中故牘證為王土檄報
之契丹愧伏湖北溪蠻彭仕義叛命達為本路鈐轄兼

知澧州得蠻親信為鄉導盡平諸隘遂破其所居桃花洲仕義棄城走餘衆悉降遷禮賓使徙知邵州武岡蠻反達又討平之累遷容州觀察使涇原路副都部署治平二年以檢校太保同簽書樞密院旋出領陝西宣撫使判渭州達雖立軍功而驟躋政地神宗即位遷靜難軍留後召還改宣徽南院使判鄆州至鄆七日徙鎮鄜延种諤受威明山降取綏州夏人遂誘殺知保安軍楊定朝議以邊釁方起欲棄綏州達曰夏人既殺王官而

又棄綏不守示弱已甚且明山舉族來歸當何以處之
既而夏人欲以塞門安遠二砦來易朝廷許之達曰此
正高於六百里之策也非先交二砦不可與遣其屬趙
高薛昌朝與夏使議唯言砦基高曰二砦之北舊有三
十六堡且以長城嶺為界西至王祥符所移書固在也
虜使驚不能對乃寢其請初詔焚棄綏州達匿而不下
至是帝問大臣皆莫知達始自劾向者違詔旨之罪帝
手詔褒答加檢校太尉雄武軍留後韓絳宣撫陝西主

种諤計圖取橫山與達議出兵達曰諤狂生耳朝廷徒以家世用之必誤大事絳怒以為沮撓奏召達還明年慶州亂出判永興徙秦州王韶開熙河達案其不法朝廷遣蔡確鞠之謂達誣罔落宣徽使知潞州尋徙太原復宣徽使交趾李乾德陷邕管召為安南行營經略招討使兼荆湖廣南宣撫使請鄜延河東舊吏士自隨將行宴於便殿賜中軍旗章劔甲以示寵次長沙先遣將復邕廉至廣西討拔廣源州降守將劉應紀又拔決里

隘乘勝取枕柳門州大戰富良江斬其偽王子洪真乾
德窮蹙奉表歸命時兵夫三十萬人冒暑涉瘴地死者
過半至是與賊隔一水不得進乃班師坐貶左衛將軍
西京安置屏處十年哲宗即位復左屯衛大將軍致仕
起知潞州進廣州觀察使知河中府請老改左武衛上
將軍卒贈雄武軍節度使達抗慨喜兵學神宗嘗訪八
陣遺法對曰兵無常形是特奇正相生之一法爾因為
帝論其詳在延安使以教兵久不就遠擇諸校習金鼓

屯營者六十四人使人教一隊頃刻而成尤善用偏裨
每至所部令人自言所能暇日閱按之故臨陣皆盡其
技李復圭治慶州之敗既斬李信劉甫又欲罪鄜延都
巡檢使白玉王見達託以後事且泣言不得終養母達
哀之不遣申救甚力得免已而王大捷於新砦神宗謂
達曰白玉能以功補過卿之力也每戰先招懷後戰關
愛惜士卒不妄加誅戮其殺賊婦女老弱者皆不賞雖
坐征南無功久廢猶隱然為一時宿將云

欽定續通志卷三百二十五